



南無地藏菩薩



地藏菩薩本願經序

嘗讀地藏本願經。歷劫度世而世度仁。夫然其拯苦蘇厄則自母始。親親而仁民。仁民而愛物。庶幾近之。而要歸以虛空藏終何哉。蓋必能空諸所有。而後地獄空也。奚爲空。不作善想。不作惡想。樂既不戀。苦亦不生。善惡苦樂空。而地獄蔑不空矣。地藏本願其在斯乎。其在斯乎。地藏先度人而後自度。吾人先自度而後爲人度。惡根不結。不度自空。業力

深重。度將安施。則地藏之度人。又不若人之自度。爲最得力也。設不自度。地藏菩薩安能取必其自成正覺。又安能必其正覺在度人之後哉。自度未有不度人。度人未有不自度。故曰等覺也。嗟嗟

地藏經上

我佛不能使人度。而托之度人。不能使地獄空。而托之地藏。以空地獄。不能使凡夫之人不貪着其事。而托之虛空。藏以空地。藏洵仁矣。吾願有情自拔惡根。渾我于虛空藏。毋使地藏菩薩不忍證

果爲也。是爲序。

溫陵奉佛弟子李曾震薰沐敬撰

香讚

香雲彌布。聖德昭彰。菩提心廣。莫能量。
觸處放毫光。爲瑞爲祥。供養法中王。
南無香雲蓋菩薩摩訶薩。三稱

淨口業真言

訶。唵。烏感切修唎修唎。摩訶修唎。修修唎。薩婆

淨身業真言

唵。修哆唎。修哆唎。修摩唎。修摩唎。薩婆訶。

安土地真言

南無三滿哆。沒馱喃。唵。度魯度魯。地。音在

尾。音委娑婆訶。

普供養真言

清身業

唵。誡。音耶誡曩。三婆縛。音娃鞞日。音資囉。音來斛。

南無十方一切佛。

南無十方一切法。

南無十方一切僧。

南無本師釋迦牟尼佛。

南無大悲觀世音菩薩。

地藏經上

二

南無宏願地藏王菩薩。

南無護法諸天菩薩。

開經偈

無上甚深微妙法。

百千萬劫難遭遇。

我今見聞得受持。

願解如來真實義。

地藏菩薩本願經卷上

三藏法師法燈譯

忉利天宮神通品第一

如是我聞。一時佛在忉利天。爲母說法。
爾時十方無量世界。不可說不可說一

地藏經上

三

切諸佛。及大菩薩摩訶薩。皆來集會。讚
歎

釋迦牟尼佛。能於五濁惡世。現不可思
議大智慧神通之力。調伏剛強衆生。知
苦樂法。各遣侍者。問訊世尊。是時如來

含笑。放百千萬億大光明雲。所謂大圓
滿光明雲。大慈悲光明雲。大智慧光明
雲。大般若光明雲。大三昧光明雲。大吉
祥光明雲。大福德光明雲。大功德光明
雲。大歸依光明雲。大讚歎光明雲。放如

是等不可說光明雲已。又出種種微妙
之音。所謂檀波羅蜜音。尸羅波羅蜜音。
羼提波羅蜜音。毘離耶波羅蜜音。禪波
羅蜜音。般若波羅蜜音。慈悲音。喜捨音。
解脫音。無漏音。智慧音。大智慧音。師子

吼音。大師子吼音。雲雷音。大雲雷音。出
如是等不可說不可說音已。娑婆世界。
及他方國土。有無量億天龍鬼神。亦集
到忉利天宮。所謂四天王天。忉利天。須
焰摩天。兜率陀天。化樂天。他化自在天。

地藏經上

四

梵衆天。梵輔天。大梵天。少光天。無量光
天。光音天。少淨天。無量淨天。徧淨天。福
生天。福愛天。廣果天。嚴飾天。無量嚴飾
天。嚴飾果實天。無想天。無煩天。無熱天。
善見天。善現天。色究竟天。摩醯首羅天。

乃至非想非非想處天。一切天衆龍衆。鬼神等衆。悉來集會。復有他方國土。及娑婆世界。海神。江神。河神。樹神。山神。地神。川澤神。苗稼神。晝神。夜神。空神。天神。飲食神。草木神。如是等神。皆來集會。復有他方國土。及娑婆世界。諸大鬼王。所謂惡目鬼王。噉血鬼王。噉精氣鬼王。噉胎卵鬼王。行病鬼王。攝毒鬼王。慈心鬼王。福利鬼王。大愛敬鬼王。如是等鬼王。皆來集會。

爾時釋迦牟尼佛。告文殊師利法王子。菩薩摩訶薩。汝觀是一切諸佛菩薩。及天龍鬼神。此世界。他世界。此國土。他國土。如是今來集會。到忉利天者。汝知數不。文殊師利白佛言。世尊。若以我神力。

地藏經上

五

千劫測度。不能得知。

佛告文殊師利。吾以佛眼觀故。猶不盡數。此皆是地藏菩薩。久遠劫來。已度。當度。未度。已成就。當成就。未成就。文殊師利白佛言。世尊。我以過去久脩善根。證

無礙智。聞佛所言。即當信受。小果聲聞。天龍八部。及未來世。諸衆生等。雖聞如來誠實之語。必懷疑惑。設使頂受。未免興謗。

惟願世尊。廣說地藏菩薩摩訶薩。因地作何行。立何願。而能成就不思議事。佛告文殊師利。譬如三千大千世界。所有草木叢林。稻麻竹葦。山石微塵。一物一數。作一恆河。一恆河沙。一沙一界。一界之內。一塵一劫。一劫之內。所積塵數。盡

充爲劫。地藏菩薩。證十地果位已來。千
倍多於是數。何況地藏菩薩。在聲聞辟
支佛地。文殊師利。此菩薩威神誓願。不
可思議。若未來世。有善男子善女人。聞
是菩薩名字。或讚歎。或瞻禮。或稱名。或
供養。乃至彩畫刻鏤塑漆形像。是人當
得百返生三十三天。永不墮於惡道。文
殊師利。是地藏菩薩摩訶薩。於過去久
遠不可說不可說劫。前身爲大長者子。
時世有佛。號曰師子奮迅。具足萬行如

地藏經上

六

來。時長者子見佛相好。千福莊嚴。因問
彼佛。作何行願。而得此相。時師子奮迅。
具足萬行如來。告長者子言。欲證此身。
當須久遠度脫一切受苦衆生。文殊師
利。時長者子。因發願言。我今盡未來際

不可計劫。爲是罪苦六道衆生。廣設方
便。盡令解脫。而我自身。方成佛道。以是
於彼佛前。立斯大願。于今百千萬億那
由他不可說劫。尚爲菩薩。又於過去不
可思議阿僧祇劫。時世有佛。號曰覺華

定自在王如來。彼佛壽命。四百千萬億
阿僧祇劫。像法之中。有一婆羅門女。宿
福深厚。衆所欽敬。行住坐臥。諸天衛護。
其母信邪。常輕三寶。是時聖女。廣設方
便。勸誘其母。令生正見。而此女母。未全

地藏經上

七

生信。不久命終。魂神墜在無間地獄。時
婆羅門女。知母在世。不信因果。計當隨
業。必生惡趣。遂賣家宅。廣求香華。及諸
供具。於先佛塔寺。大興供養。見覺華定
自在王如來形像。在一寺中。塑畫威容。

端嚴畢備。時婆羅門女。瞻禮尊容。倍生
敬仰。私自念言。佛名大覺。具一切智。若
在世時。我母死後。儻來問佛。必知處所。
垂泣良久。瞻戀如來。忽聞空中聲曰。泣
者聖女。勿生悲哀。我今示汝母之去處。

婆羅門女。合掌向空。而白空曰。是何神
德。寬我憂慮。我自失母已來。晝夜憶戀。
無處可問。知母生界。時空中有聲。再報
女曰。我是汝所瞻禮者。過去覺華定自
在王如來。見汝憶母。倍於常情。衆生之

分。故來告示。婆羅門女。聞此聲已。舉身
自撲。支節皆損。左右扶持。良久方蘇。而
白空曰。願佛慈愍。速說我母所生之處。
我今身心。將死不久。時覺華定自在王
如來。告聖女曰。汝供養畢。但早返舍。端

地藏經上

八

坐思惟吾之名號。即當知母所生之處。
時婆羅門女。尋禮佛已。即歸其舍。以憶
母故。端坐念覺華定自在王如來。經一
日一夜。忽見自身到一海邊。其水湧沸。
多諸惡獸。盡復鐵身。飛走海上。東西馳

逐。見諸男子女人。百千萬數。出沒海中。被諸惡獸。爭取食噉。又見夜叉。其形各異。或多手多眼。多足多頭。口牙外出。其利如劍。驅諸罪人。使近惡獸。復自搏攫。頭足相就。其形萬類。不敢久視。時婆羅門女。以念佛力故。自然無懼。有一鬼王。名曰無毒。稽首來迎。白聖女曰。善哉菩薩。何緣來此。時婆羅門女。問鬼王曰。此是何處。無毒答曰。此是大鐵圍山。西面第一重海。聖女問曰。我聞鐵圍之內。地

獄在中。是事實不。無毒荅曰。實有地獄。
聖女問曰。我今云何得到獄所。無毒荅
曰。若非威神。即須業力。非此二事。終不
能到。聖女又問。此水何緣而能湧沸。多
諸罪人。及以惡獸。無毒荅曰。此是閻浮

地藏經上

九

提造惡衆生。新死之者。經四十九日後。
無人繼嗣。爲作功德。救拔苦難。生時又
無善因。當據本業所感地獄。自然先渡
此海。去此海東十萬由旬。又有一海。其
苦倍此。彼海之東。又有一海。其苦復倍。

三業惡果之所招感。共號業海。其處是也。聖女又問鬼王無毒曰。地獄何在。無毒荅曰。三海之內。是大地獄。其數百千。各各差別。所謂大者。具有十八。次有五。百。苦毒無量。次有千百。亦無量苦。聖女又問大鬼王曰。我母死來未久。不知魂神當至何趣。鬼王復問。聖女之母。在生習何行業。聖女荅曰。我母邪見。譏毀三寶。設或暫信。旋又不敬。死雖日淺。未知生處。無毒問曰。聖女之母。姓氏何等。聖

女答曰。我父我母。俱婆羅門種。父號尸
羅善見。母號悅帝利。無毒合掌。啓聖女
曰。願聖女速返。無至憂憶悲戀。悅帝利
罪女。生天以來。經今三日。云承孝順之
女。爲母設供脩福。布施覺華定自在王

地藏經上

十

如來塔寺。非唯菩薩之母得脫地獄。應
是無間罪人。此日悉得受樂。俱同生訖。
鬼王言畢。合掌而退。婆羅門女。尋如夢
歸。悟此事已。便於覺華定自在王如來
塔像之前。立宏誓願。願我盡未來劫。應

有罪苦衆生。廣設方便。使令解脫。佛告
文殊師利。時鬼王無毒者。當今財首菩
薩是。婆羅門女者。即地藏菩薩是。

分身集會品第二

爾時。百千萬億。不可思。不可議。不可量。
不可說。無量阿僧祇世界。所有地獄處。
分身地藏菩薩。俱來集在忉利天宮。以
如來神力故。各以方面與諸得解脫。從
業道出者。各有千萬億那由他數。共持
香華。來供養佛。彼諸同來等輩。皆因地

藏菩薩教化。永不退轉。阿耨多羅三藐
三菩提。是諸衆等。久遠劫來。流浪生死。
六道受苦。暫無休息。以地藏菩薩廣大
慈悲深誓願故。各獲果證。既至忉利心
懷踊躍。瞻仰如來。目不暫捨。爾時世尊。

地藏經上

十一

舒金色臂。摩百千萬億。不可思。不可議。
不可量。不可說。無量阿僧祇世界。諸分
身地藏菩薩摩訶薩頂。而作是言。吾於
五濁惡世。教化如是剛強衆生。令心調
伏。捨邪歸正。十有一二。尚惡習在。吾亦

分身百千萬億。廣設方便。或有利根。聞
即信受。或有善因。勤勸成就。或有暗鈍。
久化方歸。或有業重。不生敬仰。如是等
輩衆生。各各差別。分身度脫。或現男子
身。或現女人身。或現天龍身。或現神鬼
身。或現山林川原河池泉井。利及於人。
悉皆度脫。或現天帝身。或現梵王身。或
現轉輪王身。或現居士身。或現國王身。
或現宰輔身。或現官屬身。或現比丘比
丘尼優婆塞優婆夷。乃至聲聞羅漢辟

支佛菩薩等身。而以化度。非但佛身。獨
現其前。汝觀於吾。累劫勤苦。度脫如是
難化剛強罪苦衆生。其有未調伏者。隨
業報應。若墮惡趣。受大苦時。汝當憶念。
吾在忉利天宮。慇懃付囑。令娑婆世界。

地藏經上

十二

至彌勒出世已來衆生。悉使解脫。永離
諸苦。遇佛授記。爾時諸世界中。分身地
藏菩薩。共復一形。涕淚哀戀。白其佛言。
我從久遠劫來。蒙佛接引。使獲不可思
議神力。具大智慧。我所分身。遍滿百千

萬億恆河沙世界。每一世界。化百千萬
億身。每一身。度百千萬億人。令歸敬三
寶。永離生死。至涅槃樂。但於佛法中。所
爲善事。一毛一滴。一沙一塵。或毫髮許。
我漸度脫。使獲大利。惟願世尊。不以後
世惡業衆生爲慮。如是三白佛言。惟願
世尊。不以後世惡業衆生爲慮。爾時佛
讚地藏菩薩言。善哉善哉。吾助汝喜。汝
能成就久遠劫來。發宏誓願。廣度將畢。
即證菩提。

觀衆生業緣品第三

爾時佛母摩耶夫人恭敬合掌問地藏菩薩言。聖者。閻浮衆生造業差別所受報應。其事云何。地藏答言。無量世界。乃至國土。或有地獄。或無地獄。或有女人。

地藏經上

十三

或無女人。或有佛法。或無佛法。乃至聲聞辟支佛。亦復如是。非但地獄罪報一等。摩耶夫人重白菩薩。且願聞於閻浮罪報。所感惡趣。地藏答言。聖母。惟願聽受我粗說之。佛母白言。願聖者說。爾時

地藏菩薩白聖母言。南閻浮提。罪報名號如是。若有衆生。不孝父母。或至殺害。當墮無間地獄。千萬億劫。求出無期。若有衆生。出佛身血。毀罵三寶。不敬尊經。亦當墮於無間地獄。千萬億劫。求出無

期。若有衆生。侵損常住。玷汙僧尼。或伽藍內。恣行姪欲。或殺或害。如是等輩。當墮無間地獄。千萬億劫。求出無期。若有衆生。僞作沙門。心非沙門。破用常住。欺誑白衣。違背戒律。種種造惡。如是等輩。

當墮無間地獄。千萬億劫。求出無期。若有衆生。偷竊常住。財物穀米。飲食衣服。乃至一物不與取者。當墮無間地獄。千萬億劫。求出無期。地藏白言。聖母。若有衆生。作如是罪。當墮五無間獄。求暫停

地藏經上

十四

苦一念不得。摩耶夫人。重白地藏菩薩言。云何名爲無間地獄。地藏白言。聖母。諸有地獄。在大鐵圍山內。其最大者。有一十八所。次有五百名號各別。次有千百名字亦別。無間獄者。其獄之城。周匝

八萬餘里。其城純鐵。高一萬仞。城上火聚。少有空缺。其獄城中。諸獄相連。名號各別。獨有一獄。名曰無間。其獄周匝萬八千里。獄牆高一千仞。悉是鐵爲。上火徹下。下火徹上。鐵蛇鐵狗吐火馳逐。獄牆之上東西而走。獄中有牀。遍滿萬里。一人受罪。自見其身。遍臥滿牀。千萬人受罪。亦各自見。身滿牀上。衆業所感。獲報如是。又諸罪人。備受衆苦。千百夜。以及以惡鬼。口牙如劍。眼如電光。手復銅

爪。拖拽罪人。復有夜叉執大鐵戟。中罪
人身。或中口鼻。或中腹背。拋空翻接。或
置牀上。復有鐵鷹。啗罪人目。復有鐵蛇。
繳罪人首。鐵釘釘體。拔舌耕犁。抽腸剝
斬。烱銅灌口。熱鐵纏身。萬死萬生。業感

地藏經上

十五

如是。動經億劫。求出無期。此界壞時。寄
生他界。他界次壞。轉寄他方。他方壞時。
展轉相寄。此界成後。還復而來。無間罪
報。其事如是。又五事業感。故稱無間。何
等爲五。一者日夜受罪。以至劫數。無時

間斷。故稱無間。二者一人亦滿多人亦
滿。故稱無間。三者罪器。叉棒。鷹蛇狼犬。
碓磨鋸鑿。剉斫鑊湯。鐵網鐵繩。鐵驢鐵
馬。生革絡首。熱鐵澆身。飢吞鐵丸。渴飲
鐵汁。從年竟劫。數那由他。受苦相連。更
無斷絕。故稱無間。四者不問男子女人。
羌胡夷狄。老幼貴賤。或龍或神。或天或
鬼。罪行業感。悉同受之。故稱無間。五者
若墮此獄。從初入時。至百千劫。一日一
夜。萬死萬生。求一念間。暫住不得。除非

業盡。方得受生。以此連綿。故稱無間。地藏菩薩。白聖母言。無間地獄。略說如是。若使廣說。諸有地獄。罪器等名。及諸苦事。一劫之中。永說不盡。摩耶夫人聞已。愁憂悲泣。頂禮而退。

地藏經上

十六

閻浮衆生業感品第四

爾時地藏菩薩摩訶薩。白佛言。世尊。我承佛如來威神力故。遍百千萬億世界。分是身形。救拔一切業報衆生。若非如來大慈力故。即不能作如是變化。我今

又蒙佛所付囑。至阿逸多成佛已來。六道衆生。皆令度脫。唯然世尊。願不有慮。爾時佛告地藏菩薩。一切衆生。未解脫者。性識無定。惡習結業。善習結果。爲善爲惡。逐境而生。輪轉五道。暫無休息。動經塵劫。迷惑障難。如魚游網。將是長流。脫或暫出。又復遭網。以是等輩。吾當憂念。汝旣畢。是往願。累劫重誓。廣度罪輩。吾復何慮。說是語時。會中有一菩薩摩訶薩。名定自在王。白佛言。世尊。地藏菩

薩。累劫已來。各發何願。今蒙世尊。慇懃
讚歎。惟願世尊。略而說之。爾時世尊。告
定自在王菩薩。諦聽諦聽。善思念之。吾
當爲汝分別解說。乃往過去無量阿僧
祇那由他不可計劫。爾時有佛。號一切

地藏經上

十七

智成就如來。應供。正遍知。明行足。善逝
世間解。無上士。調御丈夫。天人師。佛。世
尊。其佛壽命六萬劫。未出家時。爲小國
王。與一鄰國王爲友。同行十善。饒益衆
生。其鄰國內。所有人民。多造衆惡。二王

議計。此衆可愍。廣設方便。而救護之。一
王發願。早成佛道。當度是輩。令使無餘。
一王發願。若不先度罪苦衆生。令是安
樂。及至菩提。我終未願先成佛道。佛告
定自在王菩薩。一王發願早成佛者。即
一切智成就如來是。一王發願永度罪
苦衆生。未願成佛者。即地藏菩薩是。復
於過去無量阿僧祇劫。有佛出世。名清
淨蓮華目如來。其佛壽命四十劫。像法
之中。有一羅漢。福度衆生。因次教化。遇

一女人。字曰光目。設食供養。羅漢問之。欲願何等。光目答言。我以母亡之日。資福救拔。未知我母。死生何趣。羅漢愍之。爲入定觀。見是光目之母。墮在惡趣。受苦。羅漢問光目言。汝母在生。作何行業。

地藏經上

十八

今在惡趣。受極大苦。光目聞語。含悲答言。我母所習。唯好食噉魚鼈之屬。所食魚鼈。多愛其子。或炒或煮。恣情食噉。計其命數。千萬復倍。尊者慈愍。如何哀救。羅漢愍之。爲作方便。勸光目言。汝可至

誠念清淨蓮華日如來。兼塑畫形像。存
亡獲報。光目聞已。即捨所愛。尋畫佛像
而供養之。加復恭敬。悲泣瞻禮。忽於後
夜。夢見佛身。金色晃耀如須彌山。放大
光明。而告光目。汝母不久。當生汝家。纔
覺飢寒。即當言說。其後家內婢生一子。
未滿三日。而乃言說。悲泣合掌。告於光
目。生死業緣。果報自受。吾是汝母。久處
暗冥。自別汝來。累墮地獄。蒙汝福力。方
得受生。爲下賤人。又復短命。壽年十三。

更落惡道。汝有何計令吾脫免。光日聞說。知母無疑。哽咽悲啼。而白婢子。既是我母。合知本罪。作何行業。墮於惡道。婢子答言。以殺害毀罵二業。受報如是。若非汝福。救拔吾難。以是業故。未合解脫。

地藏經上

十九

光日問言。地獄罪報。其事云何。婢子答言。罪苦之事。不忍再說。百千歲中。卒白難竟。光日聞已。兩淚號泣。而白空界。願我之母。永脫地獄。畢十三歲。更無重罪。及歷惡道。十方諸佛。慈哀愍我。聽我爲

母。所發廣大誓願。若得我母永離三塗。及斯下賤。乃至女身。永劫不受者。願我今日。對清淨蓮華目如來像前。却後百千萬億劫中。應有世界所有地獄。及諸惡道罪苦衆生。誓願救拔。令離地獄畜

77

生餓鬼等趣。如是罪報等人。盡成佛竟。我則然後方成正覺。發誓願已。具聞清淨蓮華目如來。而告之曰。光目。汝大慈愍。善能爲母。發是大願。吾觀汝母十三歲畢。捨此報已。生爲梵志。壽年百歲。過

78

是報後。當生無憂國土。壽命不可計劫。
後成佛果。廣度人天。其數無量。佛告定
自在王。爾時羅漢。福度光目者。即無盡
意菩薩是。光目母者。即解脫菩薩是。光
目女者。即地藏菩薩是也。過去久遠劫

地藏經上

二十

中。如是慈悲。發恆河沙願。廣度衆生。未
來世中。若有男子女人。好行惡者。乃至
不信因果者。邪淫妄語者。兩舌惡口者。
毀謗大乘者。如是諸業衆生。必墮惡趣。
若遇善知識。勸令一彈指間。歸依地藏

菩薩。是諸衆生。即得解脫。三惡道報。若能至心歸敬。及瞻禮讚歎。香華衣服種種珍寶。或復飲食。如是奉事者。未來百千萬億劫中。常在諸天受勝妙樂。若天福盡。下生人間。猶百千劫。常爲帝王。能

81

憶宿命。因果本末。定自在王。是地藏菩薩。有如此不可思議大威神力。廣利衆生。汝等諸菩薩。當記是經。廣宣流布。定自在王白佛言。世尊。願不有慮。我等千萬億菩薩摩訶薩。必能承佛威神。廣演

82

是經。於閻浮提。利益衆生。定自在王。白
世尊已。合掌恭敬。作禮而退。爾時四方
天王。俱從座起。合掌恭敬。而白佛言。世
尊。地藏菩薩。於久遠劫來。發如是大願。
云何至今猶度未絕。更發廣大誓願。惟

地藏經上

二十一

願世尊。爲我等說。佛告四天王。善哉善
哉。吾今爲汝。及未來現在天人衆等。廣
利益故。說地藏菩薩於娑婆世界閻浮
提內。生死道中。慈哀救拔。度脫一切罪
苦衆生方便之事。四天王言。唯然世尊。

願樂欲聞。佛告四天王。地藏菩薩久遠劫來。迄至於今。度脫衆生。猶未畢願。慈悲此世。罪苦衆生。復觀未來無量劫中。因蔓不斷。以是之故。又發重願。如是菩薩。於娑婆世界閻浮提中。百千方便。而

爲教化。四天王。地藏菩薩若遇殺生者。說宿殃短命報。若遇竊盜者。說貧窮困苦報。若遇邪淫者。說雀鴿鴛鴦報。若遇惡口者。說眷屬鬪諍報。若遇毀謗者。說無舌瘡口報。若遇瞋恚者。說醜陋癡殘

報。若遇慳悞者。說所求違願報。若遇飲
食無度者。說飢渴咽病報。若遇畋獵恣
情者。說驚狂喪命報。若遇悖逆父母者。
說天地災殺報。若遇焚燒山林者。說狂
迷取死報。若遇前後父母惡毒者。說返
生鞭撻現受報。若遇網捕生雛者。說骨
肉分離報。若遇毀謗三寶者。說盲聾瘖
瘂報。若遇輕法慢教者。說永處惡道報。
若遇破用常住者。說億劫輪迴地獄報。
若遇汗梵誣僧者。說永墮畜生報。若遇

地藏經上

二十二

湯火斬斫傷生者。說輪迴遞償報。若遇
破戒犯齋者。說禽獸饑餓報。若遇非理
毀用者。說所求闕絕報。若遇吾我貢高
者。說僕使下賤報。若遇兩舌鬪亂者。說
無舌百舌報。若遇邪見者。說邊地受生
報。至若閻浮提衆生。身口意業。惡習結
果。百千報應。不可稱計。今且略說如是
衆生業感差別。地藏菩薩百千方便而
教化之。是諸衆生。若不知過者。先受如
是等報。後墮地獄。動經劫數。未有出期。

是故汝等。護人護國。無令是諸衆業。迷惑衆生。四大天王。聞是語已。涕淚悲歎。合掌而退。

地藏菩薩本願經卷上

讚

地藏經上

二十三

神通遊戲。化導無緣。慈悲普濟。拔親怨。覺帝廣宏宣。妙用昭然。頓證禮金仙。南無地藏王菩薩摩訶薩。三稱

願以此功德 普及於一切
我等與衆生 皆共成佛道